

- „neina herre, lat of mich“,  
 Sprach er, „alhie sterben nu;  
 wan ich han gesehen ietzu  
 45 Und vernomen hie under  
 ein wunderleichez wunder.“  
 Niht sich enthalten mohter,  
 er chuste sein tohter.  
 Weinende er laute schre:  
 50 „we mir, tohter mein, awe!  
 Awe Eufrosine,  
 vil liebe tohter meine!  
 Mein edelez chint, mein sūzze fruht:  
 warumme liezze niht dein hohe zuht  
 55 Dich mir nicht offenbaren  
 vor etteleichen iaren?  
 So waer ich alhie mit dir beliben.  
 und o wie hast du vertriben  
 So heimleich hie die zeit  
 60 und hast überwunden wol den streit  
 Gen aller posen geiste schar  
 und pist nu lautter und chlar  
 In des himels freude chomen!“  
 do Agapitus vernomen  
 65 Ditz het, wie ez zugiench,  
 (c) vil groz wunder in beviench.  
 Drate er zu dem abte lief,  
 an ditz wunder er in berief  
 Und sagt im, wie ez was gewant,  
 70 wie ez sich het dort volant.  
 Zehant stunt auf der alde,  
 er lief so hin palde,  
 Des do chlein in verdroz,  
 sein freuden weinen was vil groz.  
 75 Do er chom, da si lach,  
 vil grozzes iamers er do pflach.  
 Weinende schrei er uberlaut:  
 „Eufrosina, gotes praut,  
 Dich hat gemachelt Jesus Christ,